

## 無處可逃

做人，有時太天真太傻，注定惹禍。**拯救遺棄寵物中心**創辦人之一的馮小姐，是那種凡人笑她太瘋癲的典型狗癡：自細鍾意動物，見流浪貓狗可憐就餵。若有自我求生能力的，就執返屋企養。因為餵狗救狗放狗，認識了一班志同道合狗友，搞咗個慈善團體組織（編號91/8538），以拯救流浪貓狗為目標。仲要工都辭埋，街頭義賣募捐，幫流浪貓狗籌旗做絕育。還透過地產代理，响元朗山卡罈搵到筍月租六千的萬四呎地方養狗。點知一年都無，竟收到政府通知指用途違契兼涉霸官地，下旨搬走。一時三刻要搵筍能容下三百幾隻貓狗的地方，動物大遷徙？談何容易！被政府逼遷事件，曾連日成為全版港聞新聞，而數目亦响短短幾個月內，暴增幾近1/3。意料之外究竟中心位處有幾山卡罈？當我們按圖索驥終於搵到流浮山沙橋下灣178號地段會址時，攝影師的手提電話螢幕顯示，電話供應商由SMC-Voda自動轉線搭上中國移動。

來迎接我們的，是無數把刺耳狗吠聲。腳甫踏入門檻，嘩全場狗滿之患，年輕的攝影助手立即忍不住扯高衣領掩鼻，三百幾隻嗚，你估嘢少！「呢度你眼見到的，全部源自屯門、元朗、粉嶺附近一帶。嚟親都一竇竇，一係地盤狗、一係俾人山長水遠丟入嚟呢度，一係非法養殖狗場執笠遺棄嘅。大部分都天殘地缺，有俾人剪斷聲帶啞咗唔識吠嘅，因為BB時發狗瘟而一世眼盲嘅，咁心絲蟲牛蟬熱毒腳破爛肉毛囊蟲皮膚病……更奇難雜症都有！」馮小姐一開口就連珠炮轟嗰啲人幾衰有陰公，我認同！同時亦想感慨說句：這所別人眼中的茅舍，已是牠們避難的天堂。

呢隻俾馮小姐响廢置了的非法繁殖狗場執番條命仔的純種歌姬犬，本來滿身潰爛有嚴重皮膚病，依家醫好七成，繼續加油呀！未足月就患上嚴重狗瘟的「菲菲」，雙目從此是終身殘廢了。

上月中，一名身患癌症的八十多歲老翁，因擔心以後無能力照顧一批早前檢拾回來的流浪B，四處求助，輾轉交託給**拯救遺棄寵物中心**照顧。「已經有四、五隻被人領養咗，呢批麻煩你幫手宣傳吓呀。」嗱隻隻健康活潑肥嘟嘟，想養狗？領養咪得囉！連環密告過去一年，馮小姐衰開有條路。先有村民認為中心的犬隻擾民、後認定場內的污水排放方式影響到鄰近蠔田的培植，於是投訴再投訴。導致環保署及漁護署先後摸上門，結果查一大輪，證實設計同處理手法都無違規。以為無事，卻旋即收到政府公函，指有人擅自改變土地用途及霸佔官地，豬場變狗場，決定撤銷豬場持牌人執照，寫明十二月三十日前要搬。「呢度係地產幫我搵嘅，嗰個所謂業主話養狗無問題我先至租，邊知塊地原來係政府先得o架！」為此馮小姐已經跳step主動去信與元朗地政署負責部門聯絡，曾二度獲延期，最新發展是延緩至四月尾前遷出，同時須繳交有關的\$9,360行政費（紅圈示），「政府要收錢，個業主前兩日又打嚟催交租，但到底應該交俾邊個呢？我哋呢啲蚊型團體無政府資助，搵個仙都難，何況搵竇！」馮小姐越講越勞氣，仲開始咳。能醫卻不懂自醫，睇嚟呢鋪真係泥菩薩過江，自身難保！

中心內有大塊空地曬太陽跑跑步，又會用活動鐵籠將大、小、有 / 冇病的狗隻分類，算有秩序。  
地址：元朗浮流山沙橋下灣 178 號地段